

Diphuputso tsa Bonokwane tsa IRS le SARS ba kopanya matsoho ho lwantshana le ditlolo tsa molao tsa matjhaba

WASHINGTON & PRETORIA – Karolo ya Ditshebeletso tsa Ka Hare tsa Diphuputso tsa Bonokwane ba tsa Lekgetho (IRS-CI) mmoho le dikarolo tsa phethahatso ya molao tsa Ditshebeletso tsa Lekgetho tsa Afrika Borwa (SARS) di kopantse matsoho ho lwantshana le ditlolo tsa molao tsa lekgetho le tsa ikonomi tse amang dinaha ka bobedi.

IRS-CI le SARS CI ba sebetsa mmoho ho hlwaya le ho fuputsa mmoho le ho tlisa toka dinokwaneng tse nang le maqhama a tshebetso dinaheng ka bobedi. Tse ding tsa ditlolo tsena tsa molao di akga ka hare bobodu ba setjhaba lepatlelong la tsa matjhaba, boqhekanyetsi ka tshebediso ya dikhompyutha mmoho le ho hlatsuwa ha tjehelete. Bolekane bona bo botjha bo se bo atlehile ho utulla dikema tse ntseng di ata tse etswang ke baphahamisi, baseprofeshenale ba kgontshang tsena mmoho le ditheo tsa ditjhelete.

“Ntwa ya lefatshe ka bophara e kgahlano le ditlolo tsa molao tsa ditjhelete ha se e ka lwanwang ke naha efe kapa efe e le nngwe. Bolekane ba rona le Ditshebeletso tsa Lekgetho tsa Afrika Borwa haufinyane tjena bo tla beha ditholwana tsa seo tshebetso ya rona e matla le tshebedisano e tlang ho se fihlella,” ho rialo Guy Ficco, Molaodi wa *Global Operations* wa IRS-CI. “Balefalekgetho le diprofeshenale tsa lekgetho tse sebedisang dikema tsa mose le tse ding tse tshopodi ho qoba melao ya U.S. le ya Afrika Borwa ba tla senolwa le ho qoswa ka molao.”

“SARS e ananela tshebedisano ena le IRS, haholoholo tsepamisaong ya rona e ntjha e hodima batho ka bomong ba ruileng le ba nang le thepa e mose. A mang a maikemisetso a rona a mawala ke ho nolofaletsa balefalekgetho ba ikobelang tefo ya makgetho a bona dinto le ho thafalletsa le ho etsa hore ditjeo e be tse hodimo bakeng sa balefalekgetho ba sa ikobeleng tefo ya lekgetho,” ho rialo Khomishenara ya SARS, Edward Kieswetter. “Re tshepa hore bolekanane bona bo tla beha ditholwana le ho latela le ho tshehetsa mekutu ya rona ya ka hare ya boitsebelo ha re ntse re lwantshana le diketso tse seng molaong tse amang dinaha tsa rona ka bobedi.”

Karolo e kgolo ya tshebedisano ena pakeng tsa naha tsena tse pedi e akaretsa thupelo e tswelang e tlang ho etellwa pele ke IRS-CI. Ditshebeletso tsa Lekgetho tsa U.S. di tswela pele ho arolelana ka mekgwa ya diphuputso tsa ditjhelete, di rupella bahlanka ba tsa molao ba Afrika Borwa mmoho le bahlanka ba mmuso mme di behe dintlhakgolo tsa dithuto tsa matjhaba tse hlahlobilweng tse amang dinaha ka bobedi.

Maqalong a kgwedi ena, IRS-CI e bile le *webinar* e ne e le mabapi le thupelo ya ho qojwa ha lekgetho mme sena e bile bakeng sa bahlanka ba molao ba ka bang 40 ba SARS. Thupelo ena e ile ya hlakisa dikema tse tshopodi tsa phiramidi tse bontshang maemo a meharo, leshano le boiteko bo bobbe bo etswang ke dikgwebo. Thupelo ena e ne e akaretsa tse fapaneng tse mabapi le ditlolo tsa molao tsa ditjhelete tsa dinaha tse tobileng dikema tsa dibanka tsa mose, ho qojwa ha tefo ya lekgetho le dikgopolotaba tse fosahetseng.